

PRAVILNIK

O DODJELJIVANJU IDENTIFIKACIONIH BROJEVA I POREZNOJ REGISTRACIJI POREZNIH OBVEZNIKA NA TERITORIJI FEDERACIJE BOSNE I HERCEGOVINE ("Službene novine FBiH", broj: 39/02, 1/03, 11/04, 2/10, 83/10, 66/11 i 104/14) - prečišćeni neslužbeni tekst -

I - OPĆE ODREDBE

Član 1.

Ovim pravilnikom propisuje se sadržaj i način dodjeljivanja identifikacionog broja poreznom obvezniku, utvrđuju se organi nadležni za dodjeljivanje ovih brojeva, proces porezne registracije poreznih obveznika, kao i dokumentacija potrebna za dodjeljivanje identifikacionih brojeva i poreznu registraciju poreznih obveznika na teritoriji Federacije Bosne i Hercegovine (u daljem tekstu: Federacija).

Član 2.

Identifikacioni brojevi formiraju se i dodjeljuju prema odredbama ovog pravilnika svim pravnim licima, drugim organizacijama, kao i fizičkim licima koja samostalno obavljaju djelatnost, a za fizička lica - građane u porezne svrhe koristi se jedinstveni matični broj građana, koji dodjeljuje Federalno ministarstvo unutrašnjih poslova - Federalno ministarstvo unutarnjih poslova.

Za fizička lica strane državljanke u porezne svrhe koristi se identifikacioni broj koji dodjeljuje Porezna uprava, a sastoji se od 13 cifara koje se formiraju na slijedeći način:

- prvih sedam cifara predstavlja datum rođenja stranog fizičkog lica,
- osma cifra je "0" kao oznaka stranih fizičkih lica,
- deveta, deseta i jedanaesta cifra predstavlja šifru države,
- dvanaesta i trinaesta cifra predstavlja redne brojeve od "001" do "999".

Prijava za registraciju vrši se podnošenjem obrasca RSFL koji je sastavni dio ovog Pravilnika.

Član 3.

Dodjeljivanje identifikacionih brojeva i porezna registracija poreznog obveznika vrši se u skladu sa Zakonom o Poreznoj upravi Federacije Bosne i Hercegovine ("Službene novine Federacije BiH", broj 33/02) (u daljem

tekstu: Zakon), a na način propisan ovim pravilnikom. Identifikacioni brojevi poreznih obveznika moraju se koristiti u skladu sa odredbama člana 15. Zakona.

Član 4.

Odredbe ovog pravilnika primjenjuju se na svako lice od kojeg se Zakonom, poreznim zakonima i podzakonskim aktima zahtijeva da poreznim organima podnesu prijavu, izjavu ili drugi dokument.

Član 5.

Porezna registracija poreznog obveznika vrši se na osnovu prijave za registraciju koju podnosi porezni obveznik, odnosno odgovorno lice u njegovo ime. Uz prijavu za registraciju podnose se dokumenti propisani ovim pravilnikom.

Član 6.

Poreznu registraciju poreznih obveznika vrši kantonalni ured Porezne uprave Federacije Bosne i Hercegovine (u daljem tekstu: Porezna uprava) za obveznike čije je sjedište na području tog kantona, a u skladu sa članom 17. Zakona i dodjeljuje identifikacioni broj poreznim obveznicima .

Član 7.

Porezna registracija poslovne jedinice nerezidenta, čije je sjedište pravnog lica izvan teritorije Bosne i Hercegovine, vrši se u nadležnom kantonalnom uredu Porezne uprave prema mjestu obavljanja djelatnosti te poslovne jedinice.

II - POSTUPAK DODJELJIVANJA IDENTIFIKACIONIH BROJEVA I POREZNE REGISTRACIJE PRAVNIH LICA I DRUGIH ORGANIZACIJA

Član 8.

Porezna registracija i dodjela identifikacionih brojeva pravnim licima i organizacijama, čiji registracioni organ nije sud, vrši se na na slijedeći način:

1. porezni obveznik - pravno lice ili organizacija dužan je naredni dan, a najkasnije u roku od pet (5) radnih dana od dana dobivanja rješenja odnosno drugog dokumenta na osnovu kojeg se vrši osnivanje pravnog lica ili organizacije, podnijeti nadležnom kantonalnom uredu slijedeće dokumente:

a. dva primjerka popunjenog obrasca prijave poreznog obveznika - pravnog lica ili organizacije (na propisanom obrascu) za dobivanje identifikacionog broja i poreznu registraciju. Obrazac prijave je sastavni dio ovog pravilnika;

b. kopiju rješenja nadležnog organa kojim se odobrava obavljanje djelatnosti po posebnim zakonima ili odluku o osnivanju pravnog lica ili organizacije ili drugi dokument na osnovu kojeg se vrši osnivanje pravnog lica ili organizacije.

2. Na osnovu navedene dokumentacije, nadležni kantonalni ured/služba Zavoda, dodjeljuje 13 - cifreni identifikacioni broj poreznom obvezniku - pravnom licu ili organizaciji.

3. Ovlašteni radnik Porezne uprave, u skladu sa instrukcijom koju izdaje Porezna uprava, procjenjuje da li porezni obveznik - pravno lice ili organizacija ispunjava sve uslove za poreznu registraciju utvrđene u instrukciji.

4. Ako se utvrdi da porezni obveznik - pravno lice ili organizacija ispunjava sve uslove za registraciju kod Porezne uprave, ovlašteni radnik registruje poreznog obveznika i izdaje Uvjerenje o poreznoj registraciji, koje sadrži i identifikacioni broj poreznog obveznika - pravnog lica ili organizacije.

5. Ako porezni obveznik - pravno lice ne ispunjava sve uslove za registraciju kod Porezne uprave, proces porezne registracije se privremenog obustavlja dok se propisani uslovi ne ispune.

Član 8a.

Porezna registracija i dodjela identifikacionih brojeva za pravna lica za čiju registraciju je nadležan registracioni sud vrši se na slijedeći način:

1. Dodjela identifikacionog broja za pravna lica čiji je registracioni organ sud vrši se prije porezne registracije na osnovu prijave za upis osnivanja subjekta upisa i upisa dijela subjekta, koju nadležni sud dostavlja u elektronskoj formi kantonalnom poreznom uredu i službi Zavoda prema sjedištu subjekta upisa.

2. Ovlašteni uposlenik Porezne uprave na osnovu podataka iz prijave iz stava 1. tačka 1. ovog člana, provjerava da li su ispunjeni svi uslovi za dodjelu identifikacionog broja shodno odredbama Zakona o poreznoj upravi Federacije BiH, Zakon o registraciji poslovnih subjekata i Zakona o privrednim društvima.

3. Ako se utvrdi da nema spornih činjenica za poreznu registraciju nadležni porezni ured/služba Zavoda, dodjeljuje 13-cifreni identifikacioni broj i obavještava sud u elektronskoj formi o dodjeljenom

identifikacionom broju radi evidentiranja istog u rješenju o upisu u sudski registar.

4. Porezni obveznik - pravno lice dužno je naredni dan, a najkasnije u roku od pet (5) radnih dana od dobijanja rješenja o upisu u sudski registar, nadležnom poreznom uredu/službi dostaviti slijedeće dokumente:

a) dva primjerka popunjenog obrasca za poreznu registraciju (obrazac prijave je sastavni dio ovog Pravilnika);

b) kopiju Rješenja o upisu u sudski registar.

5. Na osnovu dokumentacije iz tačke 4. ovog člana, ovlašteni uposlenik Porezne uprave, registruje poreznog obveznika i izdaje mu uvjerenje o poreznoj registraciji koje sadrži i identifikacioni broj poreznog obveznika."

Član 9.

Porezna registracija i dodjeljivanje identifikacionih brojeva podružnicama i jedinicama u sastavu pravnog lica ili organizacije na teritoriji Federacije vrši se na osnovu prijave (na propisanom obrascu), a po odredbama člana 8. ovog pravilnika, prema sjedištu pravnog lica ili organizacije u čiji sastav podružnice ili jedinice ulaze.

Član 9a.

Kantonalni ured/služba Federalnog zavoda za statistiku razvrstava poslovni subjekt odnosno njegove dijelove prema klasifikaciji djelatnosti i izdaje Obavještenje o razvrstavanju, nakon što Porezna uprava provede postupak dodjele identifikacionog broja i porezne registracije poslovnog subjekta odnosno njegovih dijelova.

Član 9b.

Porezna registracija i dodjeljivanje identifikacionog broja poslovnoj jedinici nerezidenta vrši se prema proceduri propisanoj odredbama člana 8a. ovog pravilnika, a na osnovu prijave za registraciju na propisanom obrascu koji je sastavni dio ovog pravilnika, koja se podnosi nadležnom kantonalnom uredu Porezne uprave prema mjestu obavljanja djelatnosti poslovne jedinice.

Pod poslovnom jedinicom nerezidenta podrazumijeva se poslovna jedinica nerezidenta definirana odredbama propisa kojim se uređuje porez na dobit pravnih lica i podružnica stranog društva registrovana u skladu sa propisima kojima se uređuje registracija poslovnih subjekata.

U smislu stava (1) ovog člana pravilnika potrebno je uz prijavu za registraciju poslovne

jedinice nerezidenta podnijeti sljedeću dokumentaciju, i to:

- ovjerenu kopiju ličnog dokumenta i punomoć lica koje će podnijeti prijavu za poreznu registraciju poslovne jedinice nerezidenta u Federaciji BiH,
- za građevinske ili montažne radove koji traju duže od 6 mjeseci (ili period koji je utvrđen u ugovorima o izbjegavanju dvostrukog oporezivanja) ovjerenu kopiju ugovora.

Svi dokumenti iz stava (3) ovog člana moraju biti prevedeni od strane ovlaštenog prevodioca.

Ovlašteni predstavnik poslovne jedinice nerezidenta, dužan je u roku od pet dana od dana prestanka poslovnih aktivnosti nerezidentne poslovne jedinice, odnosno od dana upisa prestanka u sudski registar društava, podnijeti zahtjev za odjavu iz registra nerezidentnih poslovnih jedinica na propisanom obrascu iz stava 1. ovog člana, zbog prestanka rada nadležnom kantonalnom uredu Porezne uprave.

Član 10.

Porezni obveznik - pravno lice ili organizacija, dužan je uvjerenje o poreznoj registraciji poreznog obveznika istaknuti na vidnom mjestu na lokaciji sjedišta poreznog obveznika. Uvjerenja za podružnice pravnog lica ili druge organizacije istaknut će se na lokaciji te podružnice.

Član 11.

Identifikacioni broj sastoji se od 13 cifara koji se formira na sljedeći način:

- prva cifra je "4" koja označava da je identifikacioni broj formiran i izdat u Poreznoj upravi FBiH,
- druga cifra je "2" koja označava da se radi o poreznom obvezniku - pravnom licu ili organizaciji sa teritorije Federacije,
- narednih sedam cifara predstavlja brojeve koje prema svojoj metodologiji dodjeljuje Porezna uprava FBiH,
- naredne tri cifre određuju podružnice i poslovne jedinice pravnog lica i mogu dobiti vrijednost od "001" do "999". Ako pravno lice nema podružnica ili poslovnih jedinica, tada su ove tri cifre "000",
- trinaesta cifra je kontrolni broj za prethodnih dvanaest cifara identifikacionog broja.

Član 12.

Nadležni sud koji registrira pravna lica u skladu sa Zakonom o registraciji poslovnih subjekata u Federaciji Bosne i Hercegovine, odnosno organ koji je prema federalnim zakonima nadležan za registraciju drugih organizacija, obavještava nadležni kantonalni ured Porezne uprave i kantonalni ured/službu Zavoda o registraciji, ponovnoj registraciji, stečaju ili likvidaciji ili reorganizaciji pravnih lica ili organizacija isti dan, a najkasnije u roku od pet (5) radnih dana od dana registracije, ponovne registracije, ili od početka postupka stečaja, likvidacije ili reorganizacije pravnog lica ili organizacije.

III - POSTUPAK DODJELJIVANJA IDENTIFIKACIONIH BROJEVA I POREZNE REGISTRACIJE FIZIČKIH LICA - PODUZETNIKA

Član 13.

Postupak porezne registracije i dodjele identifikacionih brojeva fizičkim licima - poduzetnicima vrši se na način utvrđen u čl. 8., 9., 10. ovog pravilnika, uz podnošenje sljedećih dokumenata:

- a. dva primjerka popunjenog obrasca prijave poreznog obveznika - poduzetnika (na propisanom obrascu) za dobivanje identifikacionog broja i poreznu registraciju. Obrazac prijave je sastavni dio ovog pravilnika;
- b. odobrenje za obavljanje samostalne djelatnosti izdato od strane nadležnog organa. Uvjerenja o poreznoj registraciji koja se izdaju poreznim obveznicima - poduzetnicima pohranjivat će se na svakoj lokaciji gdje porezni obveznik obavlja poslovne aktivnosti.

Član 14.

Identifikacioni broj poreznog obveznika - poduzetnika sastoji se od 13 cifara i formira se na sljedeći način:

- prva cifra je "4" koja označava da je identifikacioni broj formiran i izdat u Poreznoj upravi Federacije BiH,
- druga cifra je "3" koja označava da se radi o poreznom obvezniku - poduzetniku sa područja Federacije,
- narednih sedam cifara predstavlja brojeve koje Poreznoj upravi Federacije BiH dodjeljuje poreznom obvezniku - poduzetniku u svrhu njegove identifikacije. Ovaj broj je različit za svako fizičko lice - poduzetnika,
- naredne tri cifre određuju poslovne jedinice poduzetništva i može dobiti vrijednost od "001" do "999". Ako poduzetništvo nema poslovnih jedinica, tada su ove tri cifre "000".

- trinaesta cifra je kontrolni broj za prethodnih dvanaest cifara identifikacionog broja poreznog obveznika - poduzetnika.

Član 15.

Organ uprave ili drugi nadležni organ koji registruje fizička lica - poduzetnike u skladu sa zakonima Federacije obavještava nadležni kantonalni ured Porezne uprave/službu Zavoda o fizičkim licima - poduzetnicima koja su registrovana, čija je registracija poništena u roku od pet (5) radnih dana od dana izdavanja, oduzimanja ili poništenja rješenja o obavljanju djelatnosti.

IIIa - POSTUPAK DODJELJIVANJA IDENTIFIKACIONIH BROJEVA I POREZNE REGISTRACIJE DIPLOMATSKIH I KONZULARNIH PREDSTAVNIŠTAVA, MISIJA I MEĐUNARODNIH ORGANIZACIJA

Član 15a.

Postupak dodjele identifikacionih brojeva diplomatskim i konzularnim predstavništvima, misijama i međunarodnim organizacijama u svrhu korištenja istog za plaćanje poreza i doprinosa iz plaća zaposlenika - rezidenata Federacije BiH, vrši se na način i po postupku utvrđenom Čl. 8., 9. i 10. ovog pravilnika, uz podnošenje dva primjerka popunjenog obrasca prijave (obrazac DKP) za dobivanje identifikacionog broja.

Obrazac prijave (DKP) je sastavni dio ovog pravilnika.

IV - OBAVEZE POREZNIH OBVEZNIKA

Član 16.

Ukoliko porezni obveznik, trenutno registrovan prema odredbama ovog pravilnika, promijeni djelatnost, mjesto poslovanja, vlasništvo, rukovodno lice, kapital, pravni status ili bilo koji drugi element svog poslovanja, osnuje i briše podružnicu ili jedinicu u svom sastavu, tada je porezni obveznik dužan sutradan, a najkasnije u roku od pet (5) radnih dana, na propisanom obrascu prijave promjena, koji je sastavni dio ovog pravilnika u pismenoj formi o toj promjeni obavijestiti nadležni kantonalni ured Porezne uprave/službu Zavoda.

Ukoliko porezni obveznik, trenutno registrovan prema odredbama ovog pravilnika promijeni svoje sjedište, a novo sjedište je u nadležnosti drugog kantonalnog poreznog ureda, a ne kantonalnog poreznog ureda kod kojeg je

porezni obveznik trenutno registrovan, tada je porezni obveznik dužan sutradan, a najkasnije u roku od pet (5) radnih dana u pismenoj formi na propisanom obrascu o toj promjeni obavijestiti nadležni kantonalni porezni ured novog sjedišta.

Član 16a.

Dodijeljeni identifikacioni broj poreznom obvezniku će se oduzeti u posebnim slučajevima propisanim Zakonom o Poreznoj pravni Federacije BiH.

Postupak oduzimanja identifikacionog broja provodi se na zahtjev lica koje ima pravni interes ili po službenoj dužnosti, shodno odredbama upravnog postupka. Postupak provodi organizaciona jedinica Porezne uprave koja je i dodijelila identifikacioni broj poreznom obvezniku.

V - PRIJELAZNE I ZAVRŠNE ODREDBE

Član 17.

Porezni obveznici - pravna lica, koji posjeduju 8 - cifreni identifikacioni broj ranije izdat od strane Porezne uprave Federacije BiH, dužni su, najkasnije, do 28. februara 2003. godine postupiti po odredbama čl. 8. - 12. ovog pravilnika. Porezni obveznici koji nisu u postupku likvidacije, a koji u datom roku ne postupe prema stavu 1. ovog člana, podliježu postupku inspekcijskog nadzora Porezne uprave.

Član 18.

Pravnim licima koja nisu izvršila usklađivanje svog statusa kod nadležnog registarskog suda u skladu sa odredbom člana 382. Zakona o privrednim društvima ("Službene novine Federacije BiH", br. 23/99 i 45/00) neće se dodjeljivati identifikacioni brojevi niti vršiti porezna registracija dok ne izvrše preregistraciju, odnosno ne donesu potvrdu nadležnog registarskog suda da je postupak preregistracije u toku.

Član 19.

Porezni obveznici - poduzetnici koji, do donošenja ovog pravilnika, posjeduju Odobrenje za obavljanje samostalne djelatnosti izdato od strane nadležnog općinskog organa, dužni su, najkasnije u roku od šest mjeseci od dana objavljivanja ovog pravilnika u "Službenim novinama Federacije

BiH", postupiti po odredbama čl. 13. - 15. ovog pravilnika.

Porezni obveznici koji u datom roku ne poštuju prema stavu 1. ovog člana, podliježu postupku inspekcijskog nadzora Porezne uprave.

Član 20.

Na sve porezne obveznike koji ne postupaju po odredbama ovog pravilnika primjenit će se kaznene mjere iz Zakona.

Član 21.

Ovaj pravilnik stupa na snagu narednog dana od dana objavljivanja Pravilnika u "Službenim novinama Federacije BiH", a njegova primjena počinje 45 dana od dana stupanja na snagu ovog pravilnika za porezne obveznike sa područja cijele Federacije.